

Erindisbréf ungmennaráðs Bolungarvíkurkaupstaðar

1. gr.

Ungmennaráð, sem starfar samkvæmt V. kafla sveitarstjórnarlaga nr. 138/2011 telst til fastanefnda Bolungarvíkurkaupstaðar. Ungmennaráð er ráðgefandi um málefni ungs fólks í sveitarfélaginu og skal starfa í samræmi við æskulýðslög nr. 70/2007 sem og önnur þau lög sem um hana gilda, samþykktir Bolungarvíkurkaupstaðar og erindisbréf þetta.

2. gr.

Erindisbréf þetta byggir að auki á ákvæðum stjórnsýslulaga nr. 37/1993 og eftir atvikum ákvæðum annara laga og reglugerða sem ná til málaflokka ungmenna. Ungmennaráð skal við undirbúning mála og stjórnvaldsákvæðana gæta þess að farið sé að stjórnsýslulögum og reglum um vandaða stjórnsýslu.

Ef það er misræmi milli efnis erindisbréfs, annars vegar, og laga, reglna og samþykktar Bolungarvíkurkaupstaðar, hins vegar, skulu hinar síðarnefndu reglur gilda.

3. gr.

Fræðslumála- og æskulýðsráð óskar eftir tilnefningum í ungmennaráð að hausti ár hvert og gerir að því loknu tillögu um fulltrúa í ráðið. Fulltrúar skulu vera á aldrinum 13 til 25 ára og eiga lögheimili í Bolungarvík. Ungmennaráð er skipað fimm fulltrúum og þremur til vara í samræmi við B3 lið 46. gr. samþykktar um stjórn Bolungarvíkurkaupstaðar. Við val á fulltrúum í ungmennaráð skal leitast við:

- Að kynjahlutföll séu sem jöfnust
- Að þrír fulltrúar í ráðinu séu á aldrinum 13 til 15 ára og tveir fulltrúar á aldrinum 16 til 25 ára.
- Að fulltrúi geti ekki verið lengur í ráðinu en tvö til þrjú ár í röð.

Bæjarstjóri boðar til fyrsta fundar ráðsins en á honum skiptir ráðið að öðru leyti með sér verkum.

4. gr.

Starfsmaður félagsmiðstöðvar er starfsmaður ráðsins. Hann undirbýr og boðar fundi ráðsins í samráði við formann. Hann í samráði við bæjarstjóra ber ábyrgð á að samþykktum og ákvörðunum ráðsins sé hrint í framkvæmd. Starfsmaður félagsmiðstöðvar og/eða staðgengill hans situr fundi og hefur þar málfrelsi og tillögurétt.

5. gr.

Ungmennaráð hefur yfirumsjón með málefnum ungmenna í Bolungarvíkurkaupstað. Ungmennaráð vinnur að markmiðum sínum með stefnumótandi samþykktum og ákvörðunum sem taka mið af samþykkttri stefnu ráðsins, fræðslumála- og æskulýðsráðs og bæjarstjórnar.

Bæjarráð úthlutar fjárhagsramma til ráðsins vegna fjárhagsáætlunar fyrir hvert starfsár.

6. gr.

Hlutverk ungmennaráðs er:

- Að vera ráðgefandi um málefni sem tengjast ungu fólki á aldrinum 13 til 25 ára í sveitarfélaginu.
- að koma skoðunum og tillögum ungs fólks til viðeigandi aðila í stjórnkerfi sveitarfélagsins,
- að gæta hagsmuna ungs fólks t.d. með umfjöllun og umsögnum um einstök mál sem snerta aldurshópinn sérstaklega,
- að fulltrúar ráðsins þjálfist í lýðræðislegum vinnubrögðum og læri á stjórnkerfi sveitarfélagsins,
- að gera tillögur til bæjarstjórnar um stefnumörkun um málefni ungs fólks,
- að undirbúa þing ungs fólks í samstarfi við viðeigandi stofnanir og starfsmenn og fylgja eftir ályktunum þinga.

7. gr.

Fulltrúa er skylt að sækja alla fundi nema um lögmæt forföll sé að ræða, svo sem önnur brýn skyldustörf eða veikindi. Geti fulltrúi ekki sótt fund skal hann boða varamann í sinn stað.

Fundir skulu haldnir að minnsta kosti fjórum sinnum á ári eða oftar ef þurfa þykir. Formaður ráðsins hefur vald til að taka ákvörðun um að fella niður fund ef hún byggir á málefnalegum ástæðum. Til fundar telst löglega boðað hafi allir atkvæðisbærir fulltrúar eða/og varamenn í forföllum aðalmanna svo aðrir sem seturétt eiga á fundinum, verið boðaðir með að minnsta kosti tveggja sólarhringa fyrirvara með skriflegri dagskrá.

Komi upp mál sem krefst skjótrar úrlausnar ráðsins getur fyrirvari um boðun verið skemmri. Heimilt er að taka mál til meðferðar í ráðinu þótt það sé ekki tilgreint í dagskrá en það skal tilkynna í upphafi fundar. Þó er skylt að fresta afgreiðslu slíks máls ef einhver ráðsmanna óskar þess.

Fundur er lögmætur ef löglega er til hans boðað og meira en helmingur atkvæðisbærra fulltrúa er mættur á fundinn. Ráðið getur enga bindandi ályktun gert nema fundur sé lögmætur.

8. gr.

Um fundarsköp og málsmeðferð í ungmennaráði fer eftir sem við á samkvæmt III. kafla samþykktar um stjórn Bolungarvíkur.

Formaður ráðsins stýrir fundum þess. Fundir ráðsins skulu jafnan haldnir fyrir luktum dyrum. Ráðið getur boðið á sinn fund einstaka starfsmenn bæjarins sem og aðra til viðræðna um einstaka mál.

Fulltrúar skulu gæta trúnaðar um það sem þeir verða áskynja í starfi ráðsins og leynt á að fara samkvæmt lögum eða eðli máls. Þagnarskylda helst þó látið sé af þessum störfum. Ákvæði þetta á einnig við um aðra fundarmenn.

Ungmennaráð skal á fundum sínum taka fyrir þau erindi sem berast, fjalla um þau og gera tillögur um afgreiðslu þeirra hjá fræðslumála- og æskulýðsráði. Á fundum er mál afgreitt með því að samþykkja það eða fella, vísa því frá eða vísa því til afgreiðslu fræðslumála- og æskulýðsráðs, bæjarráðs, eða til stafsmanns félagsmiðstöðvar.

Ungmennaráði er heimilt að fresta afgreiðslu máls nema um sé að ræða mál sem að lögum ber að afgreiða fyrir tiltekinn tíma. Ráðið getur vísað málum til umsagnar annara nefnda, ráða eða annara aðila.

Fulltrúi á rétt á að fá bókaða stutta athugasemd um afstöðu sína til máls, sem til meðferðar er í ráðinu. Ungmennaráð kemur ákvörðunum sínum og stefnumótun í framkvæmd með formlegum samþykktum á lögætum fundum. Formaður eða aðrir fulltrúar ungmennaráðs skulu snúa sér til starfsmanns félagsmiðstöðvar og/eða bæjarstjóra með eftirfylgni staðfesta samþykktá ráðsins.

9. gr.

Ráðið skal halda fundargerðabók og ritari skal færa fundargerð í fundargerðabók. Um ritun fundargerðar gilda sömu reglur og um ritun fundargerða bæjarstjórnar, sbr. 16. gr. samþykktar um stjórn Bolungarvíkur.

Fundargerðir ungmennaráðs þarfnast umræðu í fræðslumála- og æskulýðsráði sem og staðfestingar bæjarstjórnar Bolungarvíkur til að teljast gildar. Fundargerðir ráðsins skulu teknar á dagskrá bæði fræðslumála- og æskulýðsráðs og bæjarstjórnar og skal það gert svo fljótt sem unnt er að afloknum fundi. Ef fundargerðir innihalda ekki ályktanir eða tillögur sem þarfnast sérstakrar staðfestingar bæjarstjórnar eru fundargerðir lagðar fram til kynningar.

10. gr.

Ungmennaráð skal í allri sinni ákvarðanatöku hafa hagsmuni allra íbúa að leiðarljósi. Það leggur þær skyldur á fulltrúa í ráðinu að setja ávallt almannahagsmuni ofar sérhagsmunum, hvort heldur sínum eigin eða einstakra hópa er þeir tengjast eða tilheyra.

Fulltrúi hefur ekki atkvæðisrétt um mál sem varða hann sjálfan eða náð skyldmenni hans og skal hann í slíkum tilvikum víkja af fundi. Um hæfi fulltrúa og starfsmanna ungmennaráðs er vísað til 20. gr. sveitarstjórnarlaga nr. 138/2011, sbr. II. kafla stjórnsýslulaga nr. 37/1993 og 17. gr. samþykktar um stjórn Bolungarvíkurkaupstaðar.

11.gr

Ungmennaráð heyrir undir fræðslumála- og æskulýðsráð. Fundargerðir ungmennaráðs skulu lagðar fyrir fræðslumála- og æskulýðsráð áður en þær fá fullnaðarafgreiðslu í bæjarstjórn.

12. gr.

Erindisbréf þetta hefur verið samþykkt í bæjarstjórn Bolungarvíkur og tekur gildi þann 11. mars 2025.